

【火燒岫崗<sup>1</sup>】李宜諭原作

在鄉下，鬧鬧熱熱個舊曆年一過啊忒，又伸著恬靜個生活。毋過，行過消防隊時，會看著該一臺一臺個消防車駛出車庫停在路脣，雖然看毋著無閒泊杈個身影，乜聽毋著緊張刺耳個警報聲，毋過，空氣裡背因等息把仔愛停動個電波，一種神經擱纏個氣氛。

舊曆二月係美濃人掛紙個時節，恁多年天時改常<sup>2</sup>，春雨慢到，二月個岫崗燥絲絲仔，故所，第一個拜六掛紙個臨暗開始，就會看著岫崗頂出現沖天個煙，接下來紅紅個火光就透出來吔：阿姆哀唷，火燒岫崗哩！消防車個身影像走相逐樣仔春一路出，警報聲在街路項颺等過<sup>3</sup>，一臺、兩臺、三臺……總概都出動哩，毋過，斷烏過後就難耐吔，高不將換手腳流掠個阿兵哥，拿等鏟仔、刀嫲同附近個竹頭、樹仔、草仔劈忒——斷火路。

第二日打早，「轟……叮叮叮叮、叮叮叮叮」直升機個聲就在天頂來來去去響無停。「直升機去美濃湖舀水哩啲！」美濃湖

黏時鬧熱起來，大家煞煞號隻好位仔，坐下來定定仔看等直升機在湖面舀水個景象。遠遠飛過來個直升機，會到美濃湖個時節，就會定定仔降下來，等到肚屎下背個大袋仔揆著水面，佢就會遽遽同袋仔向前拖一下再擲起來，淦淦一大袋個水就吊起來吔，續等就同這恁大袋個水晃晃激激<sup>4</sup>吊到廣善堂背個岫崗頂，對半天高倒啊下。恁大袋個水，隨化做一陣白白個濛煙散淨淨。

天頂個直升機一轉又一轉、對打早飛到斷烏；山腳下消防車個水一管又一管緊洩；岫崗該紅紅個火跡對山前遶到山背、對山坪遶到山頂。恬靜個暗夜，總會聽著竹頭燒到劈里啪啦<sup>5</sup>響個聲，火屎就跔等風一哪仔飛，等到天光該下，人家個屋頂、大路項、田坵肚跌到全全係烏烏個火燂煤。岫崗個火日夜燒等，山下個消防車、救護車、阿兵哥乜日夜掌等……。下把仔，伸著沖天個白煙，大家想愛轉擺<sup>6</sup>一下個時節，紅紅個火尾又好恬恬個躡啊出<sup>7</sup>，就恁仔一直愛燒到掛紙結束。

火燒岫崗對環境、對山林個破壞十分大，看著劈竹頭個阿兵哥分樹杈仔剛<sup>8</sup>到手同面都血流血著，實在分人已毋盼得！掛紙個方式，係毋係需要鄉親好好來思考、參詳呢？

<sup>1</sup> 岫崗：音 in gong<sup>ˊ</sup>；小山崗。

<sup>2</sup> 改常：音 goi<sup>ˋ</sup> song<sup>ˊ</sup>；反常。

<sup>3</sup> 颺等過：音 xiu den<sup>ˋ</sup> go；行動迅速如風而過。

<sup>4</sup> 晃晃激激：音 gong<sup>ˊ</sup> gong<sup>ˊ</sup> gieb gieb；因搖晃使得水從容器中溢出來。

<sup>5</sup> 劈里啪啦：音 pi li pa la；擬聲詞。形容爆裂、拍打等的連續聲音。

<sup>6</sup> 轉擺：音 zon<sup>ˋ</sup> bai<sup>ˋ</sup>；休息。

<sup>7</sup> 躡啊出：音 liung<sup>ˊ</sup> a cud<sup>ˋ</sup>；鑽出來。

<sup>8</sup> 剛：音 gua<sup>ˋ</sup>；被尖銳的東西劃破。

【竹蔗下个蟬仔】羅紫云原作

屋脣該墩竹蔗仔，種幾下年咁當大墩，斬忒又會過綻筍，繼續煞猛生到青禾禾仔，該竹蔗目長水多，清甜好食。

逐年大體到五月開始，日日到臨晝仔，竹蔗墩就會有一群著等青衫，當靚當得人惜个蟬仔。這兜頭大尾尖、翼又長个草蟬，細細仔像手指尾恁大隻定定，黏在這長長青色个竹蔗葉下，佢兜盡力拈在該啦歌哩曲，鬧熱煎煎。佢兜總係恁仔唱：「揸揸揸兒<sup>1</sup>——揸揸揸兒——」清亮个歌聲，一直到下晝兩點零正會煞棚，毋識喊瘡。

草蟬仔下班過後，媠牯蟬<sup>2</sup>跔等上棚，佢黏在竹蔗仔脣該頭榮榮个苦棟樹頂，算係最大隻个蟬仔：圓身著等一身烏色个西裝盡亮線。大聲唱等佢兜个戀歌：「瞻<sup>3</sup>——瞻瞻瞻！瞻——瞻瞻瞻！」佢兜全部背等一臺天生个放送頭<sup>4</sup>，該聲骸放送到當遠个人都聽得著。佢心情好个時節，就阿腦佢兜唱歌仔真好聽；心情毋

好，又試著佢兜吵耳塞窟！毋過，一想著佢兜來到這世界，就淨短短幾日仔定定，就當佩服佢兜恁勇敢、恁煞猛打拚，來完成唯一愛做个聲事<sup>5</sup>——傳宗接代个精神。該，佢就無麼个好怨嘆，乜原諒佢兜个嘶骸另命咧！

在這鬧熱个時節，佢兜一張凳仔恬恬坐在竹蔗脣詳細聽，還會發現佢兜毋係儘採唱个哦！佢兜曉得照順序、有條理，成時獨唱、成時合唱，就像係有人指揮樣仔。佢兜个歌聲有時高亮、有時低吟，成下仔大聲、成下仔細聲；佢兜个音色乜無共樣，有个較尖、有个較溫柔。其實，蟬仔有當多種，佢兜一年、三年、五年、十三年、十七年，長年都歇在暗暗个泥竇肚。佢兜困在烏泥肚，培養破土个熱情，在多年个等待過後，化地底能量做聲量，衝破重圍，就為著這短短幾日仔个自由高唱。

佢心肝緊想：這墩竹蔗仔無掖肥，敢係因為聽了蟬仔熱情嘹亮个歌聲，正會緊生緊高緊榮？該佢兜人，乜愛像蟬仔恁知足，知恩圖報，逐日天轉笠媠花，這一生人就多姿多彩哩！

<sup>1</sup> 揸揸揸兒：音 iam iam iam iˊ；此指草蟬的叫聲。

<sup>2</sup> 媠牯蟬：音 maˊ guˊ samˊ；此指臺灣熊蟬。

<sup>3</sup> 瞻：音 sam；此指臺灣熊蟬的鳴叫聲。

<sup>4</sup> 放送頭：音 fong sung teuˊ；本指廣播電臺的放送亭、廣播站，後多指擴音器。

<sup>5</sup> 聲事：音 sangˊ se；此指工作。